



საქართველოს გარემოს დაცვისა და სოფლის მეურნეობის სამინისტრო  
საჯარო სამართლის იურიდიული პირი  
გარემოს ეროვნული სააგენტო

ქ.თბილისი, დავით აღმაშენებლის გამზ. №150 ტელ.: +995 32 243 95 03; ფაქსი: +995 32 243 95 02

## ბ რ ძ ა ნ ე ბ ა

N 107/ს  
02/03/2023

107-21-4-202303021245



**შპს „ქართული საინვესტიციო ჯგუფი ენერჯის“ წალენჯიხისა და ჩხოროწყუს მუნიციპალიტეტებში გამავალი 220 კილოვოლტი ძაბვის საჰაერო ელექტროგადამცემი ხაზი „ხობის“ ექსპლუატაციის პირობების ცვლილებაზე სკრინინგის გადაწყვეტილების შესახებ**

შპს „ქართული საინვესტიციო ჯგუფი ენერჯის“ მიერ, გზშ-ის ჩატარების საჭიროების დადგენის მიზნით, სსიპ გარემოს ეროვნულ სააგენტოში წარმოდგენილია წალენჯიხისა და ჩხოროწყუს მუნიციპალიტეტების ტერიტორიაზე გამავალი 220 კილოვოლტი ძაბვის საჰაერო ელექტროგადამცემი ხაზი „ხობის“ ექსპლუატაციის პირობების ცვლილების სკრინინგის განცხადება.

2018 წლის 16 აპრილს შპს „ქართული საინვესტიციო ჯგუფი ენერჯის“ წალენჯიხისა და ჩხოროწყუს მუნიციპალიტეტების ტერიტორიაზე გამავალი 220 კილოვოლტი ძაბვის საჰაერო ელექტროგადამცემი ხაზი „ხობის“ გაყვანასა და ექსპლუატაციაზე გაიცა გარემოსდაცვითი გადაწყვეტილება (ბრძანება №2-247).

2022 წლის 30 მაისს, შპს „ქართული საინვესტიციო ჯგუფი ენერჯის“ წალენჯიხისა და ჩხოროწყუს მუნიციპალიტეტებში გამავალი 220 კილოვოლტი ძაბვის საჰაერო ელექტროგადამცემი ხაზი „ხობის“ ექსპლუატაციის პირობების ცვლილებაზე გაიცა სკრინინგის გადაწყვეტილება (ბრძანება №118/ს), რომლის თანახმად დაგეგმილი ექსპლუატაციის პირობების ცვლილება არ დაექვემდებარა გარემოზე ზემოქმედების შეფასებას.

გარემოზე ზემოქმედების შეფასების ანგარიშისა და გარემოსდაცვითი გადაწყვეტილების თანახმად, 220 კილოვოლტი ძაბვის საჰაერო ელექტროგადამცემი ხაზის მოწყობის მიზანია მდ. ხობისწყლის ხეობაში „ხობი 1“ და „ხობი 2“ ჰესების მიერ გამომუშავებული ელექტროენერჯის სახელმწიფო ენერგოსისტემაში ჩართვა. 220 კილოვოლტი ძაბვის საჰაერო ელექტროგადამცემი ხაზი „ხობი“ მოიცავს №1 საყრდენსა და სს „საქართველოს სახელმწიფო ელექტროსისტემას“ ბალანსზე არსებული ქვესადგურის „ჯვარი 500/220“

პორტალს შორის მონაკვეთს. ელექტროგადამცემი ხაზის დერეფნის სიგრძე შეადგენს 19,033 კილომეტრს (№1-72 საყრდენები).

სკრინინგის განცხადების მიხედვით, დაგეგმილი ექსპლუატაციის პირობების ცვლილებით გათვალისწინებული ეგზ-ის მონაკვეთი მდებარეობს წალენჯიხის მუნიციპალიტეტის ტერიტორიაზე. დოკუმენტის თანახმად, ეგზ-ის მშენებლობის პროცესში, №62 საყრდენის განთავსების სიახლოვეს, დაფიქსირდა კულტურული მემკვიდრეობის ობიექტი („მამუკიას ჯიხა“). იმის გათვალისწინებით, რომ №62 საყრდენი მოქცეულია ზემოაღნიშნული კულტურული მემკვიდრეობის ძეგლის ფიზიკური დაცვის არეალში, საჭირო გახდა №62 და №60 საყრდენების განთავსების ადგილმდებარეობის მცირედით ცვლილება. კერძოდ, წარმოდგენილი ექსპლუატაციის პირობების ცვლილებით დაგეგმილია №60 საყრდენის გადატანა დასავლეთით, დაახლოებით 31 მეტრით (GPS კოორდინატები: X-260077.05 Y-4729365.89), ხოლო №62 საყრდენის - სამხრეთით, დაახლოებით 50 მეტრით (GPS კოორდინატები: X-259718.0 Y-4729609.4). აღნიშნულის გათვალისწინებით, მცირედით შეიცვლება ეგზ-ის ბუფერი. გარემოზე ზემოქმედების შეფასების ანგარიშითა და გარემოსდაცვითი გადაწყვეტილებით განსაზღვრული ყველა სხვა პარამეტრი - საყრდენების განთავსების ადგილები, საყრდენების რაოდენობა, დერეფნის მარშრუტი, საქმიანობის მახასიათებლები და მშენებლობის/ექსპლუატაციის პირობები დარჩება უცვლელი. ამასთან, საპროექტო ეგზ-ის ბუფერის კორექტირება არ გამოიწვევს ეგზ-ის განაპირა სადენებიდან საცხოვრებელ სახლებამდე დაშორების მანძილის ცვლილებას.

სკრინინგის განცხადების მიხედვით, ექსპლუატაციის პირობების ცვლილება ითვალისწინებს საპროექტო დერეფანში ჭრას დაქვემდებარებული მცენარეთა ინდივიდების რაოდენობის 141 ერთეულით გაზრდას. კერძოდ, აღრიცხვის შედეგების მიხედვით №58 საყრდენიდან №70 საყრდენამდე იჭრებოდა 573 ერთეული ხე-მცენარე, ხოლო ექსპლუატაციის პირობების ცვლილების შემდგომ მოიჭრება 714 ერთეული. ექსპლუატაციის პირობების ცვლილების ფარგლებში დამატებით მოსაჭრელ ხე-მცენარეებს შეადგენს 81 ერთეული თხმელა (მურყანი), 40 ერთეული აკაცია და 20 ერთეული რცხილა. ექსპლუატაციის პირობების ცვლილება არ გამოიწვევს ჭრას დაქვემდებარებული „წითელი ნუსხის“ სახეობების რაოდენობის გაზრდას.

„სახელმწიფო ტყის ფონდის საზღვრების დადგენის შესახებ“ საქართველოს მთავრობის 2011 წლის 4 აგვისტოს №299 დადგენილებით დამტკიცებული სახელმწიფო ტყის საზღვრების მიხედვით, ეგზ-ის მთლიანი ფართობიდან 417 019 მ<sup>2</sup> მდებარეობს სსიპ ეროვნული სატყეო სააგენტოს მართვას დაქვემდებარებულ სახელმწიფო ტყეში. კერძოდ, წალენჯიხის სატყეო უბნის წალენჯიხისა და ჯვრის სატყეოების ყოფილ საკ. ტყეში და ჩხოროწყუს სატყეო უბნის მუხურის სატყეოს ყოფილ საკ. ტყეში და თაიას სატყეოს კვარტალ №1-ში. მონაცემთა ელექტრონული გადამოწმების შედეგად დგინდება, რომ ექსპლუატაციის პირობების ცვლილების ფარგლებში გათვალისწინებული №60 საყრდენი ხვდება სახელმწიფო ტყეში.

წარმოდგენილი ინფორმაციის თანახმად, დაგეგმილი ექსპლუატაციის პირობების ცვლილება არ იქნება დაკავშირებული გარემოს სხვადასხვა კომპონენტებზე, კერძოდ, ატმოსფერული ჰაერის ხარისხზე, წყლის გარემოზე და ნიადაგზე, ასევე, ხმაურისა და ვიბრაციის გავრცელებით გამოწვეული ზემოქმედების გაზრდასთან. სკრინინგის განცხადების მიხედვით, ექსპლუატაციის პირობების ცვლილება ასევე არ უკავშირდება დამატებითი სამშენებლო სამუშაოების წარმოებას და ნარჩენების წარმოქმნის გაზრდას.

„გარემოსდაცვითი შეფასების კოდექსის“ მე-7 მუხლის მე-5 ნაწილის შესაბამისად, სკრინინგის განცხადება გამოქვეყნდა სააგენტოს ოფიციალურ ვებგვერდზე და წალენჯიხის მუნიციპალიტეტის საინფორმაციო დაფაზე. ადმინისტრაციული წარმოების ეტაპზე, საზოგადოების მხრიდან აღნიშნულ საქმიანობასთან დაკავშირებით წერილობითი შენიშვნები და მოსაზრებები სააგენტოში არ ყოფილა წარმოდგენილი.

სკრინინგის განცხადების შესწავლით დგინდება, რომ დაგეგმილი ექსპლუატაციის პირობების ცვლილება, სპეციფიკისა და მასშტაბის გათვალისწინებით, არ გამოიწვევს გარემოზე მნიშვნელოვან ზემოქმედებას.

**ზემოაღნიშნული კრიტერიუმების გათვალისწინებით, „გარემოსდაცვითი შეფასების კოდექსის“ მე-5 მუხლის მე-12 ნაწილისა და მე-7 მუხლის მე-6 ნაწილის საფუძველზე,**

#### **ვ ბ რ ძ ა ნ ე ბ:**

1. მიღებულ იქნეს სკრინინგის გადაწყვეტილება, რომ შპს „ქართული საინვესტიციო ჯგუფი ენერჯიას“ წალენჯიხისა და ჩხოროწყუს მუნიციპალიტეტებში გამავალი 220 კილოვოლტი ძაბვის საჰაერო ელექტროგადამცემი ხაზი „ხობის“ ექსპლუატაციის პირობების ცვლილება არ დაექვემდებაროს გარემოზე ზემოქმედების შეფასებას;
2. შპს „ქართული საინვესტიციო ჯგუფი ენერჯია“ ვალდებულია საქმიანობა განახორციელოს 2018 წლის 16 აპრილს გაცემული გარემოსდაცვითი გადაწყვეტილებით (ბრძანება №2-247) განსაზღვრული პირობების შესაბამისად, წარმოდგენილი ცვლილების გათვალისწინებით;
3. შპს „ქართული საინვესტიციო ჯგუფი ენერჯია“ ვალდებულია სახელმწიფო ტყის ტერიტორიაზე დაგეგმილი საქმიანობა შეათანხმოს სახელმწიფო ტყის მართვის უფლების მქონე ორგანოსთან;
4. შპს „ქართული საინვესტიციო ჯგუფი ენერჯია“ ვალდებულია ექსპლუატაციის პირობების ცვლილებამდე უზრუნველყოს №60 და №62 საყრდენების სამშენებლო მოედნების საინჟინრო-გეოლოგიური (გეოტექნიკური) კვლევების შედეგების სააგენტოსთან შეთანხმება;
5. შპს „ქართული საინვესტიციო ჯგუფი ენერჯიასთვის“ ზემოაღნიშნული პირობები წარმოადგენს 2018 წლის 16 აპრილს გაცემული გარემოსდაცვითი გადაწყვეტილებით (ბრძანება №2-247) განსაზღვრული პირობების განუყოფელ ნაწილს და მათი შესრულება სავალდებულოა;

6. ბრძანება დაუყოვნებლივ გაეგზავნოს შპს „ქართული საინვესტიციო ჯგუფი ენერჯის“;
7. ბრძანება ძალაში შევიდეს შპს „ქართული საინვესტიციო ჯგუფი ენერჯის“ მიერ ამ ბრძანების გაცნობისთანავე;
8. სკრინინგის გადაწყვეტილების გაცემიდან 5 დღის ვადაში გადაწყვეტილება განთავსდეს სააგენტოს ოფიციალურ ვებგვერდზე და წალენჯიხის მუნიციპალიტეტის აღმასრულებელი ან/და წარმომადგენლობითი ორგანოს საინფორმაციო დაფაზე;
9. ბრძანება შეიძლება გასაჩივრდეს თბილისის საქალაქო სასამართლოს ადმინისტრაციულ საქმეთა კოლეგიაში (თბილისი, დ. აღმაშენებლის ხეივანი, მე-12 კმ. №6) მხარის მიერ მისი ოფიციალური წესით გაცნობის დღიდან ერთი თვის ვადაში.

თამარ ფიცხელაური



სააგენტოს უფროსი

სსიპ გარემოს ეროვნული სააგენტო